

台  
州  
札  
記

台州札記卷五

臨海洪頤煊

小鑑湖

賀允中字子忱上蔡人紹興二十九年參知政事終  
資政殿大學士紹興初寓居天台應心泉記云居士  
賀子忱編茅為居與其孥寓居於天台山萬年禪院  
之西是也後買屋郡城松隱集賀子忱喜容贊云中  
山之陽佛宮與隣有老人焉鷗不亂羣赤城志小鑑  
湖在東湖北乾道中賀參政允中建時公罷政寓此  
唐賀知章嘗請鑑湖一曲故為名曾惇東湖懷賀子  
忱詩云不負春風爛漫晴聊驅小隊出郊坰一百五

日可無酒二十四絃須細聽溶溶漾漾沙鳥白短短  
長長溪柳青賀監扁舟在何許惜無妙墨記蘭亭

退老堂

呂忠穆公頤浩建炎四年寓臨海築退老堂於東郊  
一時朝野名公卿俱有題詩載天台集成大亨詩云  
懇辭釣軸逸祠庭園闢東郊以退名花木爭妍雖寓  
目干戈未戢可忘情范賓寅詩不令甲第起康莊卻  
問郊園作草堂廬阜規模臨嵒岬沈溪浣顏色俯滄浪  
陳公輔詩經營堂宇近江濱退老功成名遂身門外  
魚龍欣得地園中草木暖藏春張澈詩背郭堂成樂  
趣真碧油幢下海山春誰知種木十年手元是擎天

一柱人公亦有次韻詩見瀛奎律髓一云東郊卜築  
傍溪流菡萏香中寄小舟脫去簪紳歸畝故悟來漁  
釣勝公侯又云東郊半隱繞羣峰門外滔滔一水通  
再歲依棲欣有幸十年遭際歎無功堂當在東湖旁  
與靈江相近

郭太尉山居

郭仲荀字傳師洛陽人官至太尉慶遠軍節度使紹  
興中寓臨海鄭謀過郭傳師太尉山居詩云大固擅  
雄強一峰名紫邏戶牖開上頭可愛不可唾前山莽  
馬未一一窻間過無人識故侯得趣貪高臥謝屐和  
李史君詩赤城霞起樓居見紫邏雲深吏隱來自注

台州後山亭子前人名紫邏取守居山亭意也老杜  
送賈閣老出守云宮殿青門隔雲山紫邏深

松隱

舊曹太尉勛紹興中寓居台州築松隱於巾子山麓公  
台城雜詩云卜築城隅久罷休數椽忽得水西頭四  
圍竹色綠寒碧一徑杉風留素秋新歲七十詩云居  
當山麓入煙蘿喬木蒼藤接翠微築室暮年今尚少  
得歸真是眼中稀和錢大參題松隱明秀堂詩云溪  
聲山色助清豪小葺衡茅望玉霄四明樓攻媿鑰模  
太尉子曹紹墓誌稱公以餘財為鄉曲義事建佑聖  
殿於松隱山為一方祈福之地佑聖赤城志作佑政

字今稱東殿其地當與余新居芝園蘇相近

南園

松隱集獨步南園寄子忱詩云野老悲春事相如復  
倦游肯來傾濁酒同與散清愁遠岫重重柳晴江處  
處舟飛紅殘照晚閒倚水邊樓南園夜宿有懷詩云  
老病杜門久佳時誰與過親朋懷我少風月向人多  
梅影橫清夜江聲動白波不知潮早晚牆外聽漁歌  
次李提舉過南園飲散賦詩韻小山叢薄樓南郭蘭  
若蔽虧如聞錯竹色低侵几案涼海雲常壓波濤惡  
南園又當在中子山南麓城根

蔡瞻明宅

蔡向字瞻明東平人紹興初提舉浙東常平因寓臨

海松隱集有次蔡瞻明題南園詩云小亭倚山肋東  
望渺雲海松蘿翳窗戶披拂大塊噫細路窘步武幽  
花植湫隘隣有長者轍乃幸接符采山為戲秀潤水  
亦舞澎湃語真頓忘歸談宗知有在復拜五字句新  
喜入四大尚期一笑繫天宇約暗快瞻明寓居亦當  
與南園相近

蔡內翰卷

蔡崇禮字叔厚北海人官至寶文閣學士建炎中寓  
臨海書錄解題秦檜初罷相崇禮當制有御筆詞頭  
藏其家檜再相下台州追索時崇禮已死幸不及禍

赤城志棊內翰巷在州東二百八十步今不知其處

### 錢丞相府

赤城志美德坊在州東北一里以錢丞相居此故名  
羅城圖有錢丞相府在州城東北隅白雲山麓

揮塵前錄吳越國忠獻王錢佐堯其弟佖襲位未幾  
為其大將胡進思所廢時忠懿王倣為台州刺史進  
思迎立之元豐中王之孫暄知台州其子景臻自郡  
入都選尚仁宗女是為秦魯長主靖康末 騎犯闕  
王避狄南來因遂卜居後數年詔即州賜第主享之  
二十年壽八十六薨於天台其子伯誠居之又二十  
年官至少師年亦八十餘少師子即處和也處和之



女又自台州被選為王妃去歲處和既為執政別營  
甲第南北相望甚夥一家盛事常占北境

宋史公主列傳秦魯國賢穆明懿大長公主建炎初  
避地南渡至揚州朝謁復避地之閩紹興三年自閩  
至會稽入見因留居焉後徙台州建夫以來朝野雜  
記紹興四年詔居紹興府移台州

攻媿集觀文殿學士錢公端禮行狀公清癯如不勝  
衣而眸子瞭然如神仙中人始至台呂忠穆頤浩一  
見歎賞以公輔期之初厲瑞巖僧舍年餘始卜築於  
城之東北隅有林泉之勝立精舍繙經其中暇日幅  
巾野服與方外之士徜徉笑傲觴詠 爽甚自適也

天台續集樓鑰陪沈虞御使君游錢園詩云休沐無  
官事公庭晚放衙城中尋勝地道上引高牙潭府支  
芳徑東巖訪物華山林真愛絕棟宇謝豪奢陶令親  
栽菊秦侯晚種瓜裴公餘綠野六一醉瑯琊幽阪森  
三友飛橋架百花樹深藏曲折谷險露豁衍道院羅  
星斗禪房供釋迦蒼峰思御氣畫舸想乘槎佳趣城  
環雉吟邊路繚蛇登山攜翠袖喝道屏銀槁井市花  
相映湖波柳半遮高歌驚野鳥疊鼓亂鳴蛙陞級青  
珉滑秋千絲旆斜叢筍穿嫩筍芳卉綻新葩靜憩方  
開宴徐行更試茶仙醪斟瑪瑙玉指奏琵琶清絕器  
塵遠蒼茫望眼賒詩情彌海嶠飲興渺天涯賢尹民

同樂名郎子克家才高修月戶筆妙補天媧揮塵風  
流勝憑欄笑語誇追風慙歎段倚玉愧蒹葭逸韻迷  
春蝶清歡接暮鴉舞茵收地錦畫燭照籠紗耄稚欣  
相告興臺靖不詳微風朝趁馬好雨夜隨車土脉興  
原隰霖膏潤甲芽相將勸耕去和氣滿桑麻  
陶南邨輟耕錄吾鄉錢叔琛氏贊其家在郟城東北  
隅亭臺沼沚聯絡映帶猶是先朝賜第

溪風亭

張師正大梁人字子正官至宜州觀察使河東都統  
制紹興中寓臨海陳公輔題張子正觀察溪風亭詩  
云我家近東城南湖屢嘗游往時古隄岸路行人人

愁棘籬散荒園狸鼠呼啾啾好景豈終廢發見端有  
由張公山西將帷幄久運籌晚歲倦征討雅懷在林  
丘人方棄不取公乃得所求除治見佳趣經營出奇  
謀竹窗清景亂梅軒暗香浮中間溪風亭淨嶸誇碧  
流虛簷極宏敞坐見羣山幽終夜自泠泠六月長颺  
颺蕩漾月波起飄急雲霓收曠然天宇間清思何悠  
悠高明幾還往玉笋特勸酬相從同一醉庶以消百  
憂羨公强健身萬事心不留獨愛池館閑永日嘗休  
休公才自無雙何用歎不侯試訪舊職中此樂寧有  
不

玉寒堂

王卿月字清叔乾道五年進士歷秘書郎權中書舍  
人直學士院終太府卿樓攻媿撰墓誌銘載其事蹟  
極詳築園北山之麓取孔德璋移文中語列為扁牓  
清叔有自題北山玉寒堂詩三首刻柱上春光又過  
九之一十日大都五日晴陰明要是不須問日日為  
春來一行客來清話固所欲遇酒草酌又何傷是非  
耳不願聽乞我半日心清涼松成不見種松人借  
爾相陪現在身歲月暗銷松暗老焉知此地不荆榛

東巖堂

曾丰東巖堂記郎中陳公劃所辟城東數十畝而東  
西之東所揭曰小瑤曰生秋曰瓜風曰窈露曰齊芳

凡五匪亭臺伊軒榭西所揭曰開春曰見笑曰問開  
曰花真曰飲菜曰數紅曰記好曰涉趣曰四友凡九  
匪伊誰之外則二堂突兀五九右東曰東巖五之會  
也西曰勝賞九之會也物不能勝東巖又西勝之之  
歟園所揭十六大歸取花竹木故事命之公名廣  
壽字成鄉中赤城志知饒州陳廣宋壽丞刑部侍郎東巖堂在東  
倉部郎中知饒州宋宗正丞刑部侍郎東巖堂在東湖  
後山宮左在明為王恆叔士性白鷗莊恆叔有記

吳文叟山居

胡世將癸丑三月十日自湧泉寺過吳文叟山居臨  
溪觀魚輒題二詩云雲物起爭巖石秀水泉行帶野

花香一山應接知無暇賴有青春白日長偶尋勝賞  
到山扉溪影涵暉動翠微正欲臨流看魚樂扁舟寧  
待夜潮歸蘇遲建美乙酉冬日自婺女攜家至臨海  
歲首汎舟憇天柱精舍謁吳君文叟山林感泉石之  
勝城邑之人沈酣勢利不知山中之樂也詩云列嶂  
崢嶸植翠屏寒泉淨綠浸軒楹衣中清潤玻璃上窗  
牖疎明圖畫成塵世正趨名利域山中不識鼓鼙聲  
暮年憂患將何適暫喜滄浪可濯纓赤城志不載其  
人

藥園

謝飯葯園小畫記飯先世既無盈餘  
漂流轉徙不

能治生產居不敢近州縣粗辦一屋冢舍之旁總而  
名之曰葯園有僧了宗者來游寫以淡墨樹輪相糺  
林木茂翫藤蘿滋蔓樓閣隱於其中靈石寺也出苔  
蘚山門緩步荒徑扶平頭奴載一壺酒貌伂也垂楊  
夾道叢條插籬羅漢大樹映門者園也下瞰黃柑隄  
後浸白蓮池上偃蓋松紫霄諸峯羅列目下是為水  
芝軒蓬蓿數楹中檻靈泉館僧閑柄鹿於後有坐起  
更衣之房是為挽衣寮水泉甘香隣曲汲不絕作屋  
陰樹是為潤畦亭祀茅蓋頭孤鶴暮入題鶴乘後望  
古松百章籬內巨竹滿坡面雙槐背五章一 二內  
榜曰劔青由堂而西上薜荔階別一小邱最後得之



地多蕙茨不絕其本乃結草庵簷以竹瓦榜曰明珠  
主人或挽衣於寮或拘甕於亭出灌諸畦或坐於堂  
上使童奴蘇蘭薪桂酌泉烹茶或采蓮劇藥惟意所  
在朱子題謝少卿藥園詩二首謝公種藥地窈窕青  
山阿青山固不羣花藥亦婆娑一掇召冲氣三掇散  
沉疴先生澹無事端居味天和老木百年姿對立方  
嵯峨持此供日夕不樂如何小儒忝師訓迷謬失其  
方一為狂醒病望道空茫茫頗聞東山園芝朮緣高  
岡瘖聾百不治效在一探囊再拜藥園翁何以起人

膏肓

兵明可園林

吳明可芾故嘗卜居其鄉石井之西負山臨湖蔣花  
竹築亭館其間延衰數里榜曰湖山清曠窈窕甲於  
東南以直龍圖閣學士致仕又作景疏希白之堂而  
自號曰湖山居士日與賓客浮舟倚杖徜徉其間酌  
酒賦詩竟日不倦如是者十有四年見朱子所撰神  
道碑

見一堂

鹿郎中何世居臨海東鄉白竹巖所居山水清佳極  
園林之勝曰見一堂曰止室曰小東山曰桂堂曰雲  
籠曰柑隅曰枕蹊曰月沼曰星潭曰三友徑曰竹隴  
曰梅坡曰松嶺樓攻媿俱有詩見集中見一堂尤著

名攻媿有再過鹿伯可詩云又上先生見一堂澹然  
賓主兩相忘不知海內清風滿但覺山中白晝長小  
雨絡林妨蠟屐靚妝環坐快瑤觴曲終扶杖欲歸去  
朗詠白駒三四章

趙明道宅

攻媿集趙明道墓誌銘公諱伯直字明道其父武德  
郎南渡始寓於台州公初監黃巖縣酒稅歷官明州  
兵馬都監主管台州崇道觀晚號老圃負郭卜居于  
種花亦時節互秀無日不徜徉其中卒葬臨海縣大  
固鄉蔡嶺之原去武德墓西少南三十步子師却從  
朱子游最有聲

李庚宅

書錄解題診癡符二十卷御史臨海李庚子長拱庚  
乙丑進士以湯鵬舉薦入臺家藏書甚富樓攻媿序  
其集云少年筆力絕人部使者以牋翰委公從容泛  
應無不曲當時余伯父揚州為漕使公首以長牋進  
謁有曰哀懷錯落有秋風鱸膾之思舊學荒涼無春  
草池塘之夢伯父一見擊賞延為賓客不復以寮吏  
過之遇余倅丹丘始得拜公之門公方買屋近郊古木  
交陰庭州錯列若隱士居聚書數萬卷於樓上閉門  
不與人通老矣猶沈酣其中里閭罕識其面

# 慶善樓

赤城志慶善里在縣西北舊名迎恩因陳貽範有藏書樓曰慶善後同第貽序中第子師恭亦舉行故改今名宋史藝文志慶善樓家藏書目二卷臨海陳貽範著明王禕萬卷樓記臨海陳氏有藏書之樓曰萬卷樓陳氏世儒家五季時自金華來居縣西之松里族大以蕃衣冠相繼至宋少卿府君始即所居作樓藏書逮其諸孫大著府君復新之入國朝大德間大著之季待制府君又新作之而聚書益多皆其後人待制名剛中字勿齋元史有傳松里即慶善里在縣西四十五里

## 謝參政府

赤城志大固鄉哀繡里慶元六年葉守竄為謝丞相

深甫立上台坊在縣東五里慶元六年葉守竄建以  
謝丞相居此故名即今東門外謝里王却是也謝采  
伯容齋筆記嘉熙庚子中秋前一日大火余亟率僕  
二十人入城救護亡侄寺丞靈櫬因畧望於共樂堂  
是其所居在城外附近之證後遷居城內羅城圖有  
謝參政府在悟真坊前瓔珞街

### 雪巢

林憲字景思奉符人中特科監西嶽廟乾道中隨妻  
祖賀參政允中寓臨海號雪巢先生尤哀雪巢記云  
吳興林君景思寓居天台城西之蕭寺破屋數椽不  
蔽風雨榜其燕坐之室曰雪巢日戒詩於其間釋道

全題林景思雪巢詩云不嫌茆把蓋頭低為愛平簷  
野雪迷自與蘆花夢明月高寒空候鶴來梅田地虛  
明不受塵巢中人是個中人忽然一色淨無迹月到  
梅梢亦轉身

陳箕窓宅

箕窓集暗室記陳子之居身且隘其東有塾方丈潔  
而幽完而不華陳子愛之迺朝夕於斯焉然牖外則  
垣垣外則塗塗去垣咫尺垣與牖亦如之故局塞躡  
蔽不足以照日因遂榜曰暗室不言所在以集攷之  
拙養齋記云寧川土厚俗龐士大夫淬禮義而厲名  
節予家郡城相望不通屨題思濟兄詩軸云從事叔

祖以文章道德伏一鄉猶記童時吾父挾以見摩頭  
謂曰寥寥吾族汝勉哉叔祖歿父即世小子誦遺言  
面熱環顧城南族譜誰共奮哉叔祖有孫三人長字  
思濟吾兄也每來自金鼈必相訪送伯父歸餘杭序  
云尚思仰奉華顛歸老怡憤峯之下箕窻所居當在  
郡城南巾子山之麓

桑世昌居近石橋

陸游陸孺人墓誌銘云孺人山陰陸氏嫁為承議郎  
知梧州高郵桑公莊之妻自幼奉佛法嘗舟行泝汴  
遇老桑門丐錢孺人亟施之且問曰師何許人老如  
此尚行乞邪對曰居天台兄第十八人我獨好遠游



故抵此汝與我有宿契他日當為隣及承議寓居天台適近石橋孺人一日登應真閣修茶供至第三尊者驚歎曰此吾汴舟所見也孺人年七十四以淳熙十二年正月己丑卒明年某月甲子葬於天台之太平鄉朴畧社承議之墓子三人長之瑞<sup>早</sup>卒次世昌次世茂世昌從諸公問學不以貧奪其志人以為積善之報

浮岡別業

陳耆卿竹邨居士林君墓碑君名師點字詠道所從多有道師儒尤嗜書近購遠求家已卷數千猶典衣傳鈔恐晚古帖斷刻亦餘千卷子表氏自幼即鄉學

所儲書益富吳子良康吉堂記云侍郎王公榜林君  
詠道之堂曰康吉林君死餘十載士大夫猶喜道之  
余友其子逢吉而問過其堂則環顧皆書也詠道所  
居浮岡在縣北十里松山畧地多梅花徐大受題林  
詠道浮岡別業詩密林凝晝寂一葉動須驚砌淨飛  
花影池深落果聲正宜鋪枕筆且復倒瓶罌向晚催  
歸急煙江野艇橫樓攻媿次韻沈使君懷浮岡梅花  
詩玉人迴在山谷裏不有使君誰與憐毋庸高牙殺  
風景為著佳句增孤妍寒溪照影漫千樹橫笛吹殘  
又一年傳聞年後更多在便思躍馬趨平川

環碧亭

陸游劍南詩稿題徐淵子環碧亭亭有茶山曾先生  
詩云茶山丈人厭器諱幅巾每訪博士家小亭談笑  
不知暮往往城上聞吹笳興來傑作粲珠壁歲久妙  
墨亡龍蛇郎君弟子多白髮回頭日月如奔車徐卿  
赤城古仙子十年四海推才華覽觀陳迹喜不寐旋  
補罅漏支傾斜曲池還浸古來月叢莽忽見當時花  
重題舊句照高棟力振風雅排淫哇席間絃袍已散  
鶴堂上講鼓初停榻速宜力置竹葉酒不用更淪桃  
花茶注桃花茶見曾公詩曾詩今不傳亭當為淵子  
重新今亦莫知其所在

王綽雲海觀記松山丁君少雲始即其所居之南依山之麓闢而為園遠近蔽虧高下輝映回還委折而曰堂曰亭曰臺曰榭曰林曰坡曰窩曰谷無慮二十餘所意匠翦裁各成面勢自小垂虹而入跨蓮蕩不知其幾何故有堂歸乎其上也曰芙蓉龍川陳同甫來自永康一見心可每與少雲少詹擊節抵掌窮日竟夜距今五十有二年子植倦游來歸遐想舊事因芙蓉之故址敞為傑閣高軼霄漢既成而以雲海觀目之蓋取坡公玉霄雲海之詞以足先世之所未為者陳耆卿松山林壑記云松山林壑者丁丑<sub>君</sub>少雲幽棲之所也余聞丁園名素著又以址其園者多偉人

遂益著按其所昉於少雲者二十有五衍於子植者三十有三大較松山其主名也少雲名世雄少詹名希亮子植名木少雲子嘉定四年進士官至澧州通判今為太平人

### 西橋南巷

車若水胡立方墓誌友人胡常字立方黃巖人予向年僅能一見勿庵范先生不再進而隔世後知谷口鄭公隱居有趣過抵邑必求之先祖舊有屋於西橋之南巷與立方鄰谷口訪予必訪立方予始知立方一日谷口同往縱觀古刻名書遂見勿庵思齋記言語甚甚至於是始交立方思齋者立方所名齋也鄭大

惠 谷口有飯牛集見真西山跋

閩風吟室

劉倓字次皋一字允叔寧海人嘉定元年以特科授  
黃陂主簿歸隱就里中香巖山構閩風吟室自號閩  
居士樓鑰寄題閩風劉允叔月波一字脫詩云浮海  
思乘桴拾月或挂席何如閩風仙渤澥坐中得隱几  
特觀瀾黏天四無壁清夜水不搖孤蟾靜沈璧飄風  
一過之波光湛空碧萬頃玻璃田蕩以黃金液我欲  
從之游尚恐一層隔何當携珍茶石井試餘滴

養浩齋

周密雲煙過眼錄天台謝奕修養浩齋所藏書畫

虞永興頭眩帖有機服清賞文治公言珍玩蓑笠軒  
印亦有紹興印 顏魯公鹿脯帖 乞米帖倩仲跋  
楊少師手帖 李西臺詩 蘇滄浪草書 東坡醉  
草溫公帖 陶隱居小楷大洞真經隱訣後有林希  
父子題 秦少游數帖 周越書劍器行 唐良驥  
元陵挽郎誥真元八年三月二十四日三省長官董  
晉領吏部選杜黃裳尚書右丞趙景郎中韋夏卿  
陳尚庭縣尉誥天寶三載丞相李林甫韋陟景融又  
稱陳尚庭四十三載告身乃用羅紋紙殊不可曉後  
有向若水跋 吳越承制大畧如誥勅後書天下兵  
馬元師尚父吳越王銜 王晉卿八帖皆與親賢宅

諸王書內有送酒一帖云瀑釀四器終上以酒稱釀  
可謂好奇 蘇氏譜系帖自源明坡穎而下凡五世  
世各十餘帖為六巨帙生平所觀蘇帖未有如是之  
多也 米老小楷三帖又十帖珊瑚等帖 米老親  
書楷書畫法并青山白雲字 米老辨印帖 蔡君  
謨宋書青紙上大字 東坡書繡觀音贊 吳越王  
判狀二並贊寧狀忠懿王草書判字一花押  
趙昌之花千里收 楊補之四清圖 東坡秋月圖  
并贊畢良史印小米玫瑰齋跋 米老自畫宅圖  
李後主畫戲猿後有建業文房之印 韓滉子母牛  
有錢氏合章大印 徐熙出獵圖 戴嵩著色山水



牛高宗題乾卦印 唐畫二佛 李伯時九歌曹偉  
吳傳朋跋 張萱煎茶圖 唐日本大荒西經圖思  
陵題乾卦印 胡虔獵騎圖  
已上並賈師憲故物後以此送謝堂堂不能保歸之  
起翁翁今亦不自務也漸為陳氏所藏

人二字

緣漪堂

祥字

文文山指南錄予自海舟登台岸至城門張氏家

鎮名在臨海縣東一百五十里蓋國初名將永德之後主人號哲齋

湖堂教子扁緣漪為賦八句義方堂上看窗戶翠玲  
瓏硯裏雲壇月席間漢水風清聲隨地到直節與天  
通庭玉森如筍干霄雨露功予至淮即變姓名及天

台境哲齋張為予覓綠漪詩予既賦題云清江劉洙  
書此過黃巖寄二十字魏睢變張祿越蠡改陶朱誰  
料文山氏姓劉名是洙

鳳嶼豐山

元陳高同諸友游宴豐山詩序至正戊子春正月七  
日甲辰永嘉陳高與黃巖高尚敬施謙訪朱君伯賢  
於臨海之鳳嶼越翼日乙巳伯賢與其季伯良持酒  
俎邀予登豐山時黃君順德章君子皓陳君大章欣  
然從游已而陳師聖張子材偕弟子溫亦至遂相與  
上絕頂望巨海還飲浮圖寺席既撤復舉瓊松樹間

酒酣因賦二十八韻豐山在縣南八里詩云新歲多  
幽興清游出縣城故人留欸曲好友復逢迎伯賢所  
居當亦去城不遠今豐山旁有甘家嶼疑即鳳嶼遺  
蹟

白鷗莊 以下附

明王恆叔士性白鷗莊在山宮溪左側本宋秘閣陳  
良翰東巖堂故址恆叔自記有曰紫芝山房曰空濤  
曰綠雲亭曰蓮社曰夕陽塢曰小山叢桂曰先月  
墩曰嘉樹臺曰白龍谿曰芙蓉城曰三星石曰曲水  
瀨曰小祇林曰雲碓曰臥雲坪曰忘歸石亭榭久已  
荒蕪唯基址尚存俗稱王庵云

楊園在郡城東北白雲山麓明楊總戎文之別業也  
本宋錢園故址 國朝康熙十三年耿精忠叛時惠  
獻貝子富喇塔駐台討之功蹟錄云初貝子涖台駐  
城心葉宦宅後移至城北白雲山下楊園後人即其  
地以為惠獻祠楊園其祥詳不可得聞惠獻祠近年始  
圮廢故址猶存

### 興賢坊新居

郡城陳昌虞先生始築宅於巾子山麓芝麻園街本  
宋興賢坊貢院故址乾隆八年癸亥聞儂巖文信國  
祠北最靈詣祠求乩以卜宅運得乩詞莫解其旨因  
記於家簿中及宅歸於余將移居眾始見此詞咸驚

為異因箋釋以附於後詞云中男體中女用宅坐南  
百年後先兆四貢癸亥至今八十六年言百者舉成  
三四絲兒刀其繩公之孫暨姪入土牛與水共道  
己丑年金木雙雙相構弄不須慟不須訟歸余後又  
歸洪氏初四日移入新居中中中昌熾綿  
白虎行將雲歸洞余以庚寅年正月  
綿鶴鳴頌余生於乾隆乙酉年正月十二日癸亥年  
余尚未生而乩已注定物之有定數如此

台州札記卷五終

小停雲山館

馮柳東太史小停雲山館記臨海洪君筠軒自粵東解組歸於巾子山下得宋興賢坊舊址葺而新之其地有花木泉石之勝取陶泉明詩意榜曰小停雲山館以圖郵余并命記之夫人有憂患羈愁饑驅四方求一椽之息而不可得者矣即或有位于朝極富貴利祿之榮老而思倦作為園林既成而不得乞身歸里或僅一至焉不數年間人事變遷等於飄風浮雲之倏過者往往而有君姿性過人博通羣籍玩相國定香亭筆談稱其精研經訓熟習天算貫串子史有過於齊次風侍郎者也後累舉不第僅以選拔得州

判筮仕粵東非其志也不十年即乞歸以其餘俸築  
小園藏書三萬餘卷漢唐宋元碑版二千餘通以及  
鐘鼎彝器法書名畫皆著有目錄貯度山館今年已  
七十矣鍵戶著書終日不勌暇則與朋舊講求桑梓  
故事撰成台州札記鄉邦望若神仙此其視士貧賤  
而不能得得而不能享林泉之樂者其相去為何如  
雖然寓形宇宙其迹耳古今惟名之留為可久君所  
著書有禮經宮室答問二卷孔子三朝記注八卷管  
子義證八卷讀書叢錄二十四卷平津讀碑記八卷  
續記四卷台州札記十二卷筠軒文鈔十卷詩鈔五  
卷校正穆天子傳六卷竹書紀年二卷經典集林三

十二卷漢志水道疏證五卷皆刊播藝林海內爭重  
其名自足以不朽後之過山館者想望丰采覺泉明  
五柳去人不遠若並世而生如余者乃以遠隔江海  
不獲時時造廬附於龐參軍劉遺民之列倘他日得  
以幅巾野服探天台雁蕩之奇因訪君於山館商榷  
經史同訂絕業其為欣幸又當何如也因系以詩并并  
為之記如此道光十四年四月朔日小長蘆舊史氏  
馮登府撰



台州札記卷六

臨海洪頤煊

王珏

王珏天聖二年進士臨海人終屯田郎中赤城志黃

田巷在州東南三百四十步天聖中以丞聽小吏王

珏發憤讀書同兄琥登科改名嘉祐四年惠安院大

佛殿碑題朝奉郎 博士致仕騎都尉賜緋魚

袞王珏書丹

羅適

書錄解題赤城集十卷兩浙提刑寧海羅適正之撰  
治平二年進士學於四明樓郁為吏健敏頗為蘇子

瞻劉貢父諸公所知台士有聞於世自適始秦觀淮  
海集羅君生祠堂記羅君名適字正之台州寧海人  
學術有本末通於世務風節凜然國士也嘗再被召  
見皆以不合罷歸其蒞官行己所可書者甚有書在  
江都者以為生祠記

葉適三先生祠堂記余聞鄒浩言熙豐外貴人視民  
甚蒿萊芟燎恨不力也是時能慷慨建白保赤子以  
對天命惟江都令羅適弋陽令董敦逸二人

楊蟠

宋史文苑傳楊蟠字公濟章安人也舉進士為密和  
二州推官歐陽修稱其詩蘇軾知杭州蟠通判州事

與軾倡酬居多平生為詩數千篇後知壽州卒東都  
事畧亦作章安人

歐陽文忠集有讀楊蟠章安集詩云蘇梅久作黃泉  
客我亦今為白髮翁臥讀楊蟠一千首乞渠秋月與  
春風蘇東坡集有和楊公濟梅花詩前後二十首

王直方詩話楊蟠字公濟嘗為葦菜詩云休說江東  
春日寒到未且覓鑑湖船鶴生嫩頂浮新紫龍脫香  
髯帶舊涎玉割鱸魚迎刃滑香炊稻飯落匙圓歸期  
不待秋風起漉酒調羹任我年時人以為讀其詩不  
必食葦菜然後知其味也

後山詩話楊蟠金山詩云天末樓臺橫北固夜深燈

火見揚州王平甫云莊宅牙人語也解量四至  
泊宅編楊宅塘在錢塘湖上晚罷永嘉郡而歸浩然  
有掛冠之興每從親賓乘月泛舟使二笛婢侑樽悠  
然忘返沈注贈一闕有曰竹閣雲深巢虛人聞幾年  
湖上音塵寂風流今有使君家月明夜夜聞雙笛人  
咨其清逸

張無夢

天台續集載送張無夢歸天台山詩自宋真宗以下  
名公卿其三十一人中山詩話道人張無夢在真宗  
朝以處士見除校書郎無夢善攝生梅昌言知蘇州  
無夢求見先與詩壺中一粒長生藥待與蘇州太守

分好為大言處之不疑 比李少君然無夢年九十  
死無夢語人少時絕欲屏居山中十餘歲自以為不  
動及出見婦人美色乃復歎然又一山十餘年乃始  
寂定勸人飲食毋用鹽醋煮餅淡食更有自天然味  
無夢老病耳聾其死亦無他異

日本僧

王氏談錄公言祥符中日本僧寂照來朝後求禮天  
台山先中令守會稽寂照經由來謁寂照善書迹習  
二王而不習華言但以筆札通意時長兄為天台宰  
中令以書導之兼贈詩云滄波泛瓶錫幾月到天朝  
鄉信日邊斷歸程海面遙秋泉吟裏落霜葉定中飄

為愛華風住扶桑夢自消既至天台致書來謝景幅  
勤至其字體婉美可美愛楊文公在禁中識之亦嘗  
序其事

黃巖縣尉范仲温

歐陽文忠集有范仲温可台州黃巖縣尉制云勅具  
官范仲温爾第仲淹參吾大政方欲輔朕平賞罰推  
至公以修紀綱而正庶位爾今所任有土與民惟過  
與功則有賞罰爾勤厥職可不戒哉可赤城志慶歷  
四年黃巖令仲温范文正公仲淹之兄蘇夢齡台州新  
城記西北隅以黃巖令范仲温專掌之當是其後所  
歷官也或尉是令字之譌

呂和卿

蘇東坡集呂和卿知台州敕承議郎尚書金部員外郎呂和卿臨海雖小邦而有民社之重朕豈輕之爾以任優而學誠知戒夫牆面之煩製錦之未易乎往欽用勵毋忽吾訓可依前官差權知台州赤城志郡守題名有崇寧五年呂康卿以散郎朝而無呂和卿卿

孔文仲為推官

東都事畧孔文仲舉賢良方正自台州司戶召試文仲對策極論新法之害不為王安石所喜黜不用赤城志辨誤云曾幾作遺直堂詩力辨孔文仲為州推

官非為司戶文仲曾舅也故序其事為州有公所撰  
修城記曰從事有天台詩集有浮碧軒榜有官文書  
皆曰推官或曰安知不嘗為司戶乎曰公之墓誌丞  
相蘇公之文也一命試秘書省校書郎杭州餘杭尉  
再調南康軍司理昇台州軍事推官對制策趣還本  
任未嘗為司戶宋史孔文仲傳舉進士調餘杭尉再  
轉台州推官熙寧初以制舉薦對策九千餘言力論  
王安石所建理財訓兵之法為非是罷歸故官與曾  
幾所言合東坡集亦有次韻孔文仲推官見贈詩

左經臣

左緯字經臣黃巖人以詩鳴號委羽居士黃裳委羽



居士集序赤城之南有左氏子焉不出仕常以詩自適慕王維杜甫之遺風甚嚴而有法自言每以意理趣觀古今詩莫能出此三字然考子之詩旁以意明物不以物繫其意覽者宛轉而思之卒歸乎所賦使人意虛而志遠此亦得詩之要者也

予抵丹丘之三年左經臣攜黃公序見訪嘗為跋其後今又兩年矣復持以相示予讀經臣詩編有招友人之句云一別又經無數日百年能得幾多時非特詞意清逸可翫味也老於世幻逝景迅速讀此二語能無警乎序所謂使人意虛而志遠非溢言也政和

乙未三月廿八日延平陳璣題

石公弼兄弟

宋史石公弼傳字國佐越州新昌人大觀二年拜御史中丞進兵部尚書張商英入相欲引為執政何執中吳居厚交沮之以樞密直學士知揚州蔡京再輔政羅致其罪責秀州團練副使台州安置踰年遇赦歸卒

朱文公撰石塋墓誌銘其先世為會稽新昌右族大父諱某辟庚子之亂始居台州臨海縣赤城志作祖公孺辟庚子之亂今臨海石氏皆公孺之後

瀛國夫人

揮塵後錄錢忱伯誠妻瀛國夫人唐氏正肅公介之

孫旣歸錢氏隨其姑長公主入謝欽聖向后於禁中  
時紹聖初也先有成里婦數人在焉俱從后步過受  
釐殿同行者皆仰視讀釐為離夫人笑于旁曰受禧  
也蓋取宣室受釐之義耳后喜回顧主曰好人家用  
女終是別蓋后亦以自謂也

陳子高

書錄解題天台集十卷外集四卷長短句三卷臨海  
陳克子高撰李庾子長跋其後云刑定鄉人也少時  
侍運判公貽序官學四方曾慥詩選叙為金陵人蓋  
失其實今攷集中首末多在建康且嘗就試焉當是  
僑寓也詩選又言不事科舉以召安老薦入幕府得

官按集有聞榜二絕則嘗應舉矣又有甲午歲所作  
詩云三十四則其生當在元豐辛酉得官入幕蓋已  
老矣詩多情致詞尤工

花庵詞選陳子高名克天台人呂安老帥建康辟為  
參議有赤城詞一卷

四庫全書總目東南防守利便三卷宋呂祉知建康知  
府命僚屬陳克吳若同撰書前結銜稱右迪功郎江  
南東路安撫使司准備差遣臣陳克

能改齋漫錄毛友達可內翰守鎮江時賀方回以過  
客留寓一日陳克繼至同會於郡樓即席克賦詩所  
謂徘徊臨北固慷慨俯東流是也毛稱賞曰雖杜子

美不是過矣翌日賀求去毛留之且訝去並賀曰一  
邵豈容有兩個杜子美二公相與大笑

苕溪漁隱叢話陳子高九日瑞香盛開有詩云宣和  
殿裏春風早紅錦薰籠二月時流落人間真善事九  
秋霜露卻相宜但俗因此詩遂號瑞香為錦薰籠子  
高別有古詩一篇意含諷刺語加微妙得騷人之體  
格其詩云佳人在容谷容雙星思銀河契濶不有命盛  
時豈蹉跎娟娟匡廬秀如此槩者何香蜜綴紅糝寶  
薰罩宮羅幽窗下團團微風自婆婆寂寥千年初戴  
戩蓬艾多何階託方便百金聘倚憐赤欄青篔簹丁  
寧護根窠泥沙亦天幸板聯入宣和誰令蘭蕙徒憔悴

悴守巖阿

梁谿漫志陳子高觀寧王進史圖作詩云汗簡不知  
天上事至尊新納壽王妃世稱其工

歸田詩話陳克子高題三品石云臨春結綺今何在  
屹立亭亭終不改可憐江令負君恩白頭仍作北朝  
臣望夫石云望夫處江悠悠化為石不回頭山頭日  
日風和雨行人歸來石應語二詩皆超出常格而意  
警拔不與諸作同

左譽

左譽字與言臨海人大觀三年進士終湖州通判林  
師點董將軍廟記熙寧中始開東湖欲毀其廟時衙

校左良玉者實監其役良玉無子其妻一夕夢神告曰能存吾廟當以判官為汝子妻寤以語良玉廟遂不毀未幾果得子狀肖廟之判官大觀三年登進士第官至湖州別駕名譽宇與言即其子也

玉照新志天台左君與言委羽之詩奮名重一時策名之後吟咏詩句清新嫵麗而樂府之詞好事者尤所爭先快覩承平之日錢唐幕府樂藉有名姝張芸女名穠者色藝妙天下君頗顧之如盈盈秋水淡淡春山堆雲剪水滴粉搓酥皆為穠作當時都人有曉風殘月柳三變滴粉搓酥左與言之對倣擬之後穠委身於立勲大將家易姓章疏封大國紹興中左覓

官行闕訪西湖兩山間忽逢車輿甚盛中規一麗人  
褰簾顧君而粲曰如今若把菱花照猶恐相逢是夢  
中視之乃穰也君醒然悟入別脚拂衣東渡一意空門  
佛窟山昌國禪院新開塗田記院之檀越左朝奉郎  
通判湖州左君譽嘗為之謀曰院北廿里有堰日高  
湖岸之塗泥可田也左君既亡而事不就

趙子砥

續宋編年通鑑建炎二年七月趙子砥歸自燕山得  
上皇御書以進且言金人講和以用兵我國斂兵以  
待和吾國與金國勢不兩立其不可講和明矣已而  
賜對遂命知台州



李易安

李易安金石錄後序建炎戊申冬十二月金人陷洪州上江既不可往有弟遠任勅局刪定官遂往依之到台台守已遁之剡出睦又棄衣被走黃巖顧舟入海奔行朝時駐蹕章安從御舟海道之温又之越

高宗幸章安

雲麓漫抄台州臨海縣章安祥符寺法堂有高廟御坐寺僧師顏年八十餘矣能言東巡事云時年方十四事悟講王建炎三年<sup>十</sup>二月二十六日民間謠言言天子航海東來泊金鰲山下二十八日平明有十六人皆衣戰袍步自金鰲入寺有黃領者坐頃之間寺

僧僧有素食否時方修歲懺乃取炊餅五枚以進之  
其<sup>食</sup>三已又食其半悟講主復擷園蔬芼以薑鹽進之  
有旨取一內人乃偕民間小竹與乘之以來立語良  
久復令登舟晚遂復幸金鰲凡留十四日始航海幸  
永嘉又留四十五日復航海幸金鰲又留八日忽聞  
六軍皆呼萬歲捷書至也於是航海由四明還紹興  
季正明侍郎乘桴錄云己酉十二月五日車駕至四  
明十五日大雨遂登舟至定海十九日至昌國縣二  
十六日移舟至溫台自是連日南風舟行雖穩而日  
僅行數十里二十九日歲除庚戌正月二日北風稍  
勁晚泊台州港三日早至章安知台州晁公為未上

幸祥符寺從官迎拜于道左是日餘杭把隘官陳彥  
報人馬至縣迎擊乃退六日得張俊奏云二十八二  
十九日正月二日凡三遇敵殺傷相當八日張忠正  
奏云張俊出兵擊退虜騎十四日張俊自台州來十  
八日移舟離章安十九日晚雷雨又作二十日泊青  
澳門二十一日泊溫州港國史載此事皆在四年正  
月與顏言不合然今歲懺皆開歲乃修則顏所記誤  
耶金鰲蓋一獨峰陂陀鬱茂若鼇背然正與柵浦相  
對兩溪之間畧辨牛馬東看海門雲飛波翻渺然無  
際山頂有善濟寺舊名祥符塔院紹興三十二年始  
賜額先是有人題詩云牡蠣灘頭一艇橫夕陽多處

待潮生與君不負登臨約同上金鰲背上行高廟覽  
之以為詩識求其人不可得御坐一竹椅寺僧今別  
造以黃蒙之壁間有詩云黃帽當年駕舳艫東浮鯨  
海出三吳中興事業風波惡好作君王座右圖不著  
姓氏

揮塵三錄李正氏乘桴記曰建炎己酉十二月五日  
車駕至四明居于府廨十一日親從直百餘人因宰  
執早朝至行宮門外邀宰相問以欲乘海舟何往呂  
頤浩喻以利害乃退十四日臺諫請對上喻以不得  
已之故詔六曹百司官吏並於明越温台從便居住  
於是左右司御營使司參議官皆留十五日大雨車

駕登舟至定海宰執從行十六日從行以次行十八日聞有使人至命范宗尹趙鼎復回明州十九日車駕至昌國縣二十四日遣權戶部員外郎李承造往台州刷錢帛二十五日早得越州李鄴奏乃議移舟之温台是日范宗尹趙鼎回至行在二十六日啟行自是連日南風舟行雖穩而日僅行數十里云二十九日歲除庚戌正月一日大風破海中二日北風稍勁晚泊台州港口三日早至章安鎮駐舟知台州晁公為李承造皆未上幸祥符寺從官迎拜於道左是日得餘姚杞隘官陳彥報人馬至縣迎擊乃退四日象山縣報人馬至明州張俊為戰守備六日張俊奏

云二十九日正月初二日凡敵殺傷相當九日張俊  
已自台州陸趨行在意恐金人小衄濟師而未力不  
能拒爾十四日張俊自台州來執 人一名至行在  
戮之十五日金人再犯餘姚十六日雷雨發聲十八  
日移舟離章安鎮

輟耕錄金鰲山枕海屬臨海縣章安鎮初宋高宗在  
潛邸日秦州人徐神翁能知前來事羣閹言於徽宗  
召至以賓禮接之一日獻詩於帝曰牡蠣灘頭一艇  
橫夕陽西去待潮生與君不負登臨約同上金鰲背  
上行及兩宮北狩匹馬南渡建炎庚戌正月三日帝  
航海次章安鎮灘淺擱舟落帆於鎮之福濟寺前以

候潮顧問左右曰此何山曰金鰲山又問此何所曰  
牡蠣灘因默思神翁之詩乃屏去警蹕易衣徒步登  
岸見此詩在寺壁間題墨若新方信其為異人也時  
住持僧又陞坐道祝聖之詞帝趾忽前聞其稱讚之  
語甚善戒左右勿驚怖而締聽之少焉千乘萬騎畢  
集始知為六龍臨幸野僧初不測禮節恐怖失措從  
行有司教以起居之儀山下曰黃椒邛邛之婦女聞  
天子至咸來瞻拜龍顏歡聲如雷曰不圖今日得覩  
天日帝喜勅夫人各自逐便故至今邛婦皆曰夫人  
雖易世其稱謂尚然不改

宋史盧知原傳高宗即位知温州帝東幸知原繇海道轉粟及繪畫繒十餘萬至台州召見稱獎擢右文殿修撰改徽猷閣待制赤城志盧待制知原墓在臨海縣東一百二十里柑桐

### 李顯忠

宋史李顯忠傳太后至臨安顯忠入覲加保信軍節度使浙東副總管顯忠熟西邊山川險易因上恢復策忤秦檜意遂降官奉祠台州居住

台州府志李忠襄祠在中子山天竺院祀宋李顯忠有石像存後改建縣城隍街北今俱毀

### 賀允中



南澗甲乙稿賀子忱墓誌銘公諱允中字子忱登政  
和五年進士入秘書省為校書著作郎假太常少卿  
使金國賀正旦時金人始通衆皆憚行公被選笑曰  
是可規之也歸曰敵之諸帥盜賊藪也可無慮乎所  
親執政謂公後生毋妄言靖康改元選戶部不拜命  
遂以某官致仕禍亂既作公因自放於山水至天台  
愛其幽深得地萬年山間結茆種蔬若無意當世者  
而范丞相宗尹以抱膝名其菴結興八年始得用為  
江西安撫制置大使司參議官九年入為倉部郎太  
上既更政化始起公大常少卿除禮部侍郎遷吏部  
尚書公善書筆法道美太上嘗以所臨王羲之四帖

為賜且批紙尾曰鄉留心翰墨深得八法之妙勿以  
不工為笑也拜參知政事即引年致任還台州秦丞  
相檜與公同年第進士同在學省三館且齊庚甲契  
亦甚厚而公素善趙丞相鼎李參政綱故秦用是沮  
公持甚反謂公趣向有異而公亦竟毅然不顧晚遇  
二聖致位通顯得非天邪乾道四年三月薨年七十  
九葬于天台縣太平鄉善真山之原

揮塵後錄賀子忱允中靖康中為郎或有薦其持節  
河北者子忱微聞之忽就省戶作中風狀顛仆於地  
呼之不醒同舍郎命舁之以歸即牒開封府乞致仕  
得救買舟南下初無所苦也子忱紹興初以李泰薦

落致仕又三十年為參知政事晚節末路固位而已

呂頤浩

宋史呂頤浩傳紹興八年除少傅頤浩引疾求去除  
醴泉觀使九年召赴行在以老病辭未幾卒贈太師  
謚忠穆赤城志呂丞相頤浩墓在臨海縣西北三十  
里褒忠顯績院左子摺兩浙轉運副使孫昭遠知武  
岡軍書錄解題呂忠穆家傳一卷逢辰記一卷遺事  
一卷孫昭問刻於廣德軍

續宋編年通鑑紹興十七年九月竄呂撫撫檜恨頤浩  
不已使台州守臣曾亨求其家陰事會撫嫂姜氏告  
撫悉其庶弟之母送獄治罪於是一家破矣四朝名

臣言行錄撫以朝散郎直秘閣秦檜追恨公不已使  
台州守臣曾亨即曾惇目避諱改求其家陰事會撫懼罪陽  
瘖乃以眾證定罪梧州安置與此不同

### 陳公輔

宋史陳公輔傳公輔論事剴切疾惡如讎惟不右程  
頤之學士論惜之

四朝名臣言行錄公襟懷坦夷無城府待人遇物一  
以至誠自布衣風節已有可觀兩居諫省論事闡切  
為人主所聽信視邪佞之士如讐故媚禁者眾又云  
公與朋友交初若淡薄久而益親平居奉養服飾有  
醜無華侈之習訓家以儉素不問產業屬續之日幾

不能具後事其清德又如此

范宗尹

宋史范宗尹傳台州守臣晁公為儲時豐備論者以  
為擾民宗尹陰佑之會公為妻受囚金事覺上罷公  
為宗尹不自安沈與求奏其罪狀落職退居天台卒  
年三十七

謝伋追索

揮塵後錄紹興二年秦會之罷右僕射褫職告詞云  
聳動四方之聽朕志為移建明二策之誤爾材可見  
謝任伯之文至乙亥歲秦復知御札在任伯之子伋  
景思處作劄子自陳大概云陛下是時尚未深知臣

所以有此乞行抽取得旨下台州從假所追索得之  
是秋又令其姍黨曹泳為擇酷吏劉景者擢守天台  
專欲鞠勘景思寓居外邑黃巖山間景視事之次日  
遺捕吏追逮景思直以姓名傳檄縣令差人防護甚  
峻景思自分必死將抵郡城外渡舟中望見景備郊  
迎之儀一見執禮甚恭至館舍則美其帷帳厚其飲  
食景思叵測是晚置酒延侍座間笑語極驩而罷始  
聞早已得會之計音矣又踰旬景思拜處牧之命

曹筠

揮塵三錄政和末秦會之自金陵參成均行次當塗  
境上值大雨水衝橋斷不能前進一士子於書室窗

中窺見秦徒步執蓋立風雨中淋漓淒然甚憐之呼  
入令小態至晚雨不止白其主人推食挽留而共榻  
翌日晴霽送之登途秦大感激詢士姓名云曹筠度  
堅也曹建炎初以太學生隨大駕南幸後為台州知  
錄老不任事太守張偁對移為黃巖主簿無膠膠之甚  
時秦專權久矣曹一夕偶省悟其前此一飯之恩因  
便介始作詩以致祈懇秦一覽慨然以刪定官召之  
尋改官入臺遂進南牀高宗惡之親筆逐出秦猶以  
為集英殿修撰知衢州

楊揆屏迹台州

揮塵餘話秦會之初自虜中還朝汎海至楚州楚守

楊揆子才疑以為偽即欲斬之館客管當可者謂揆曰萬一果然朝廷知之匪便不若徑遣赴行在真假自辨矣揆於是遣人陰加防閑護送至會稽會之既相訪尋當可官其二子揆屏迹天台不敢出者逾二十年會之末年始得劉景以為台州守欲與棊謝二家併治之而會之死高宗偶記其姓名召用之後為次對累典名藩斯亦命也

左君善謔

容齋三筆紹興二十五年冬秦檜死空其賜宅明年開河役夫輦泥土堆于牆下天台士人左君作詩曰格天閣在人何在偃月堂深恨亦深不見洛陽圖白



髮但知鄱陽積黃金直言動便遭羅織舉目寧知有  
照臨炙手附炎俱不見可憐泥滓滿牆陰語雖紀實  
然太露筋骨左頗有才最善謔二十八年楊和王之  
子俱除權工部侍郎時張循王之子子顏子正皆帶  
集英修撰且進待制矣會葉審言自侍御史楊元老  
自給事中徙為吏兵侍郎蓋以繳論之故左用歇後  
語作絕句曰木易已為工部侍弓長肯作長集英修如  
今臺省無楊葉豚犬超陞卒未休左居西湖上好  
請謁人或畏其口後竟終於布衣